

Visoki predstavnik poziva rukovodstva Parlamenta BiH da osigura da se izbori u Mostaru održe ove godine

Visoki predstavnik Valentin Inzko i prvi zamjenik visokog predstavnika Tamir Waser jučer su uputili pismo rukovodstvu Parlamentarne skupštine BiH kako bi apelirali na njih da usvoje pravni okvir kojim bi se osiguralo održavanje izbora u Mostaru ove godine. Ovim pismom predlažu se izmjene Izbornog zakona, na osnovu okvirnog dokumenta za koji je prošle godine saglasnost dalo šest stranaka, a kojim bi se, na osnovu postojećih gradskih područja, ustanovile tri oblasti koje bi prelazile rijeku i predstavljale izborne jedinice. Ove izmjene trebalo bi usvojiti konkretno u svrhu održavanja izbora ove godine, a izabrano gradsko vijeće imalo bi mandat do 2016. godine.

“Građani Mostara već su predugo lišeni osnovnog demokratskog prava”, rekao je Inzko. “A Parlamentarna skupština ima obavezu da provede odluku Ustavnog suda, što nije uradila već četiri godine. Imajući u vidu činjenicu da stranke nisu u stanju da Parlamentu predlože kredibilan plan, mi smo im ponudili konkretan prijedlog za razmatranje.”

Centralna izborna komisija je potvrdila da bi se, ako se izborni okvir uspostavi do 12. augusta, izbori za Gradsko vijeće Mostara mogli održati u isto vrijeme kada i opći izbori, 12. oktobra. Stoga još uvijek ima vremena da se izbori u Mostaru održe zajedno s općim izborima. Ono što je sada potrebno je politička volja da se građanima pruži ono što zaslužuju.

Odlukom iz 2010. godine, Ustavni sud BiH je naložio da se prvo

izmijeni Izborni zakon, te da se potom Statut Mostara uskladi s njim. Gradsko vijeće stoga ima priliku da predloži novu viziju za grad.

„Gradsko vijeće od početka ima ovlasti da izmijeni Statut ukoliko ima bolje ideje i prijedloge o načinu organiziranja grada. Ali, umjesto da predlože način na koji bi se situacija mogla poboljšati u korist svih, politički lideri su krivili međunarodnu zajednicu za probleme grada, a istovremeno su se vrlo dobro pobrinuli za sebe. Dok su građani Mostara nastojali da se oporave od ratnih razaranja, politički lideri su građane držali kao taoce etničkih programa s ciljem održavanja *statusa quo* čija je jedina svrha da ih održi na vlasti. Ovo se posebno odnosi na predstavnike SDA i HDZ-a BiH. Nijedna od ove dvije stranke nije ponudila pozitivnu viziju za Mostar i predložila načine koji bi doveli do rasta i prosperiteta grada koji bi mogao biti pokretač privrednog uspona u Hercegovini. Oni su se fokusirali samo na pronalaženje modela koji će im osigurati kontrolu nad najvećim resursima, a ne na modele koji će omogućiti izgradnju boljeg Mostara za buduće generacije“, rekao je Waser.

Inzko je dodao da „nepostojanje gradskog vijeća ima stvarne posljedice – proces usvajanja budžeta je daleko teži, više od 5 miliona KM koje se nalaze na računima gradskih područja ne može se iskoristiti, a javna preduzeća ne mogu normalno funkcionirati. U sva tri područja, gradski lideri su pokušali zaobići zakon, ali smo mi ostali dosljedni svom ranijem stavu – politički neuspjeh u rješavanju problema ne može biti izgovor za ignoriranje zakona. Umjesto toga, oni moraju provesti odluku Ustavnog suda.“